

Enn gude Vorschlaach

Noochdem die Fußballerei omm Sunndaach vor acht Daach erum gewese iss, hott misch de Schorsch oogerufe unn gesaad: Honnes, was hälsden defoo, wenn isch dem Dee Eff Bee, dem Fußballbund, enn Brief schreiw, um dene enn Vorschlaach ze mache.

Isch frooch: Schorsch, du willsdem Dee Eff Bee schreiw unn enn Vorschlaach mache? Ei was donn fern Vorschlaach?

Doo seet de Schorsch: Honnes, waaßde noch wie dess gewese iss in Flerschem meddem Hondball? Do sinn die Hondballspiller iwver e Spillfeld gerennd su groß wie e Fußballfeld unn nor e paar Leit hawwe einischermaße gelongweild zugeguggd. Erst donn, wie dess Hondballspille geännerd worrn iss unn se e kloo Spillfeld gemacht hawwe, iss dess onnersders worrn. Unn jetz kann merr sich su e Hondballspill im Fernseh oogugge unn dess iss effderris rischdisch sponnend.

Isch habb misch omm Kobb gekratzt weil isch nitt wusst, was de Schorsch eischendli sch wollt, weiler doch meddem Fußball oogefonge hott unn dessdeweese frooch isch: Schorsch, unn was hott de Hondball mett doim Schreiw onn die Fußballer ze due?

Isch habb de Schorsch grinse heern. Isch mach dene enn Vorschlaach, dass wie die Hondballer aach su e Fußballspill mieh Sponnung kriehe dut.

Mieh Sponnung?, frooch isch, unn wie soll dess vor sich gieh?

Honnes, seet de Schorsch, ess iss doch su gewese, dass mir all iwver hunderdzwonnsisch Minudde gugge musste, um dess eischendli Sponnende se seh, dess Elfmederschieße. Unn dessdeweese mach isch dene de Vorschlaach, dass su e Meiderschaft nor noch mett Elfmederschieße ausgedraache werdd.

Waaßde Schorsch, saach isch, dess hott ebbes ferr sich. Weil mieh wie dreiverrdel vunn su emm Spill werdd de Ball hie unn her geschoowe unn nor seldom nooch vorne geschosse, doo werdd de Fuß druffgestellt su dass isch ab unn zu gekrische habb: Vorne isses Door, du Simbel!, unn dess iss werklisch longweilich. Du moonst also, lieber Schorsch, die sollte uff die gons Kickerei verzichde unn nor noch e paar Elfmeder schieße?

Nitt e paar, seet de Schorsch, isch moon uff jeden Fall Stigger zwonnsisch. Unn wenn se donn noch mieh die Gesichter vumm Schießer unn vumm Doormonn zeiche deede wer dess gut, weil jeder vunn dene zwaa will den onnern bezwinge unn dess drigge die in ihrne Aache aus. Also moon isch, dass dess lange deet, nor noch Elfer ze schieße unn doodemett de Gewinner vunn de Meiderschaft festzestelle.

Ui jeh, saach isch, donn deede die Englänner nie enn Pokal gewinne. Die gons Sach hott nor enn Hake.

De Schorsch war neigierisch. Ei was donn fern Hake?

Jetz habb isch gegrinsd. Die gons Fußballpillerei werdd donn su korrz, dass die Sponsorn koo Werbung mieh mache unn doodemett deets nitt nor dess Elfmederschieße, naa, aach koo Meiderschaft mieh gewwe.

De Schorsch war gons traurisch: Geld regiert halt die Welt.

Isch druff: Unn vor allem die Fußballwelt.

Eiern Honnes